

Smal Game Lodge ~ 13~16 Junie

Wat 'n ervaring, hierdie langwinterweek. As jul onthou, so 2 jaarafsluitings terug het ek 'n nuwe Rietvallei woord bekend gestel, **Kampja**, en ja ons het dit die naweek gestand gedoen! Ons het GEKAMP, in die bos tussen die wild en dit op 'n plaas, sonder enige steurings ens.

Vrydagoggend 06:00 toe Marietjie en ek wegtrek, toe is die meter al op 2grade, maar dié meter het gou gedaal en weer gestyg na so 9.

Met ons aankoms by Smal Game Lodge was ons weereens verbaas oor die netheid en presiesheid van die plaasoord, heinings, geplaveide paadjies, skoon grasperke en ablusies.

Net na ons opgeslaan en ontbyt genuttig het, het die eerste waens ingetrek en so het Jak en Jacqui Wagenaar met hul gaste ook begin opdaag. Jak het 'n groepie van hul Kerkgroep, die Valley Campers, saamgebring en aan SAWA bekend gestel. Hierdie 5 gesinne het heerlik "ingesmelt" en aan al ons aktiwiteite deelgeneem. Dankie daarvoor Valley Campers!

Vrydagaand is daar Boekevat gehou deur Zelda, een van ons Valley Camper gaste, waarna daar saam gedrom is om die 2 kampvure en land en sand gesels, terwyl boontjiesop, brood en sjerrie sy ding gedoen het. Die koue het niemand afgeskrik nie en daar is tot laat gekuier om die vure – askuus, Ben en Alta het vroeg gaan inkruip, glo wel koud gekry!

Saterdagoggend is daar traag uit die vere gekruip, terwyl sommiges al die veld ingeslaan het om te voet die wild en natuur te gaan opsoek. Die oord laat ook nou toe dat jy met jou eie voertuie deur die plaas ry (teen 'n geringe tarief), wat dan ook deur 'n paar van ons gedoen is. Verder is daar rustig gekuier en hout aangedra in voorbereiding van die aand se saambraai. Jak het vir ons 'n uitstappie gereël na Groot Marico, waar so 9 van ons op 'n plaas besoek afgelê het om te leer van mampoer stook, op die tradisionele manier. Hier was ook koekies, konfyte en verskeie liquors te koop aangebied. O ja, ook vars suurlemoene is gepluk en deur van ons lede geniet, met hul eie knipmes.





Saterdagmiddag laat is daar in die boma Boekevat gehou deur 2 van ons Rietvalleiers, waarna almal die vure geniet het. Een van die Valley Campers, Shaun, het homself aangestel as Vuurmeester, wat my werk vergemaklik het en kon selfs ek rustig braai en kuier! Hier was nou werklik enigiets op die roosters, verskeie vleise, worse, groentes soos mielies en aartappels en ek dink daar was erens 'n bak slaai en pot pap ook. Die nagereg was nie eintlik sigbaar nie, ek dink dit was net Inge wat braaf genoeg was om haar gesin te trakteer, maar Gideon en Helena het 'n uithalerresep onthul met 'n warm drankie van brandewyn, Bar-one, room en melk. Dit maak enige tyd die keel skoon maar wees gewaarsku, hy is warm want hy word op die vuur in 'n blikbeker gemaak!

Sondagoggend het almal op die dek met sy mooi uitsig, bymekaar gekom en die wonderlike Skepping bewonder terwyl Jak vir ons 'n baie spesiale Vadersdag boodskap gebring het. Die naweek is reeds Sondag afgesluit met die normale afkondigings en uitdeel van plaatjies en so is daar verder rustig verkeer. Party het Sondagmiddag buurman braai gehou, ander het formele Sondagmiddagte gehou met gebraaide hoenders, groente en nagereg, terwyl ander verkies het om eers die aand 'n vuur aan te steek en hul vleisie gaar te maak.

Maandagoggend het sommige se tentpale al vroeg-vroeg geval terwyl ander teen 15:00 eers begin het om die lang pad huistoe aan te durf.

Ongelukkig was die naweek nie sonder teëspoed nie en moes Albert Gazendam Sondagmiddag en -aand saam met klein Lourens in Rustenburg se hospitaal deurbring nadat die klein ywerige fietsryertjie met 'n muur gebots het. Hy is Maandagoggend ontslaan na verskeie steke en toetse en het kom verder kamp, sonder 'n fiets maar met 'n breeë glimlag!

So is Frik en Marie Coetzee, ons Rietvallei gaste, ook veilig nadat hul woonwaband gebars het op pad terug. Gelukkig het Willem en Leona hul te hulp gesnel en kon hul weer verder ry.

Almal was dit eens, al is die oord so 30km of wat verder as wat ons gewoonlik ry, was hierdie plaaskamp 'n heerlike belewenis met hoëstaande kwaliteit teen 'n baie billike tarief, en dit vir 'n langnaweek. Baie dankie Jan en Jeanette dat jul ons so vriendelik ontvang het op jul plaas.



Hennie en Anna Marie Engelbrecht ontvang hul
175 algemeen saamtrekplaatjie.




Gideon van Zijl oorhandig aan Marietjie en Tjaart Klaasen en Jak en Jacqui Wagenaar hul kampkommandanteplaatjie



Regs verwelkom Margriet van der Berg ons naweekgaste, Frik en Marie Coetzee

Wat is lekkerder as 'n glasie mampoer en 'n vuurtjie om hitte te verskaf!





Teëspoed langs die pad met 'n gebarste motorband

